



16. august 2012

UKA 2012/64

Inatsisartut suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

**2013-imiit Avannaata imartaani aqutsiveqarfimmi - Qaanaap eqqaanilu – aaffatassat 75-inik amerlineqarnissaannik kiisalu tassunga peqatigitillugu aqutsisoqarfimmi taaneqartumi aavernik pisaqarsinnaanermut akuersissutip piniartuq ataaseq aavernik tallimanik amerlanerusunilluunniit pisaqarsinnaalersillugu Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersumi § 8, imm. 2 allangortinneqarnissaannik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaqaq Hans Enoksen, Siumut)

**Tunggavilersuut:**

Avanersuarmi ukiorpassuarni inuusaasiuvoq piniartuuneq. Ukiariartornerani piniartut inuussutissaminnik minnerunngitsumillu qimmiminnut nerukkaatissaminnik pissarsiniarlutik aaffanniartarnertik qangaaniilli pinngitsoorsinnaanagu inuusaaseraat. Taamatut inuusaaseqarnerat naammattumillu neqissarqarniarnerat illersorneqartariaqarmat avanersuarmi aaffatassat 75-nik amerlineqarnissaat siunnersuutigaaara.

Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersuq avanersuarmi silap pissusaanut, piffimmi piniartut kulturiannut assigisaanullu nalimmassartariaqarpoq. Ullumikkut pisassiisarnermi piniartup ataatsip aavernik ataatsimik pisassinneqartarnera allangortinneqartariaqarpoq akuersissut ataaseq atorlugu piniartuq tallimanik amerlanerusunilluunniit aaffassinnaaneranik periarfissaqalersillugu.

Tassami piniartut aaffanniarlutik piniariartarfiit ornikkunikkit piniartorlu ataasiinnaq aavernik ataatsimik pisasaqarpat taava piniarneq killilerujussuussaaq. Aaffanniartarfiit piniartut ornittagaat ungasippat taamaattumik aaveq ataaseq pisassatuarigaanni aaffanniarneq killilerujussuussaaq, silallu pisussaa aamma eqqarsaatigalugu aaffanniarnermi aporfissat ikinnerulertaratic. Taamatut malitassaqaqtitsineq avanersuarmiut inuusaasiannut naleqqutinngilaq allangortinneqartariaqarlunilu. Taamatut aalajangersaasimanerput ikittuinnarnik pisaqartoqartarneranik kinguneqartarpoq uffalu neqissaqarniarnikkut pisariaqaqtitsineq ukiariartornerani annertusaraluaqisoq.

Neriuutigilluinnarpara Inatsisartuni ilaasortat amerlanerusuteqarluartut una siunnersuut tamakkii-sumik tapersissagaat avanersuarmimi piniartut pisariaqaqtilluinnarmassuk inuussutigisinnaasaminnik amerlanerusunik aaffatassinneqarnissartik. Avanersuarmi piniartut piniartuunertik ingerlatiinnassagunikku pinngitsoorneqarsinnaanngilaq qimmit qimuttut issimut naleqqutunik aamma nerisassaqartinneqarnissaat.

**Allaffissornikkut aningaasaqarnikkullu sunniutissat:**

Naalakkersuisut aaffattassat amerlineqarnissaannut atatillugu suliniummut atugassanik immikkoortitsisariaqassapput, tassunga ilanngullugu Canadap Kalaallillu Nunaata pisassanik agguaaqatigiittarnerat pillugu Canada peqatigalugu ataqatigiissarinissaq. Taamattaq nalunaarutip allangortinnissaa eqqarsaatigalugu suliaqartoqarnissaa naatsorsuutigineqassaaq, suliassarli taanna Naalakkersuisut oqartussaaffiisa iluanni allaffissornikkut isumagineqarsinnaavoq.

Siunnersuut aavermik ataasiinnarmik pisassinneqartarnermut taarsiullugu tallimanik amerlanerusunilluunniit pisassinneqarsinnaanermut akuersissutinik tunniussisarnissaq Qaasuitsup kommunianut allaffissornikkut suliassatigut allannguutaannginnissaa naatsorsuutigineqarpoq.

**Allaffissornikkut aningaasatigullu namminersorlutik inuussutissarsiortunut sunniutissat:**

Qaanaami eqqaanilu aaffattassat amerlineqarpata, piniartullu ukiumut tallimanik amerlanerusunilluunniit aaffattassaqaqalerpata piniartut aaverup neqaanik tunisassaqaqarnerulissapput taamaalillutillu aamma isertitaqarnerulernissaat naatsorsuutigineqarsinnaalluni.

Taamattaq qimminut aaverup neqaanik orsuanillu nerukkaatissaqaqarnerulernissaa ilimagineqarpoq taamaalillutillu piniartut qimmit nerisassaanik avataanit tikisitanik pisinissaraluaminnut sipaaruteqassallutik.

**Allaffissornikkut aningaasatigullu innuttaasunut sunniutissat:**

Siunnersuutip piviusunnngortinneqarnera innuttaasunut aningaasatigut allaffissornikkulluunniit ajorseriaataassanngilaq.